



Na osnovu člana 17. stav (2) i člana 44. stav (1) Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61b. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, tužilac Sanin Bogunić, predsjednik Vijeća, Sanela Gorušanović - Butigan, potpredsjednica Vijeća, te sudija Izo Tankić, sutkinja Aleksandra Obradović, tužiteljica Bojana Jolović, tužiteljica Snježana Petković, sudija Sedin Idrizović, tužilac Saša Sarajlić, sutkinja Ljiljana Bošnjak - Glizijan, prof. dr. Džamna Vranić, advokat dr. sc Davor Martinović, tužiteljica Željka Fabić i advokatica Elma Veledar Arifagić, na sjednici održanoj 26. i 27.02.2025. godine, donijelo je

R J E Š E N J E **o imenovanju glavnog tužioca Okružnog javnog tužilaštva u Prijedoru**

- I. Za glavnog tužioca Okružnog javnog tužilaštva u Prijedoru imenuje se **Marić Slađana** na mandat od pet (5) godina.
- II. Datum stupanja na dužnost imenovane Vijeće će odrediti posebnom odlukom.

O b r a z l o ž e n j e

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 07.11.2024. godine objavilo javni konkurs pod brojem: 04-07-3-4035-1/2024, kojim je oglašena pozicija glavnog tužioca Okružnog javnog tužilaštva u Prijedoru.

Nakon provedene konkursne procedure, nadležno podvijeće je u skladu sa članom 61b. stav. (1) Poslovnika VSTV-a BiH za glavnog tužioca navedenog tužilaštva predložilo kandidatkinju na rang listi pod rednim brojem 1 Marić Slađanu, koja na sjednici Vijeća izlaže program rada koji je ranije dostavila i izložila komisiji za obavljanje razgovora.

U skladu sa članom 61b. st. (3), (4) i (5) Poslovnika VSTV-a BiH, nadležno podvijeće dostavilo je Vijeću obrazloženi prijedlog za navedenu kandidatkinju sa rang liste pod rednim br. 1 sa bodovima koje je ostvarila u konkursnoj proceduri i njenim programom rada, te rang listu kandidata.

Nakon izlaganja prijedloga podvijeća, predložena kandidatkinja je na sjednici Vijeća, u skladu sa članom 61b. st. (6) i (7) Poslovnika VSTV-a BiH, izložila svoj program rada.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, te na osnovu uspjeha postignutog u konkursnoj proceduri i izlaganja programa rada, Vijeće je primjenjujući odredbe člana 61b. st. (8), (9) i (10) Poslovnika VSTV-a BiH, odlučilo da za glavnog tužioca Okružnog javnog tužilaštva u Prijedoru imenuje kandidatkinju na rang listi pod rednim brojem 1 Marić Slađanu, koja trenutno obavlja dužnost tužioca Okružnog javnog tužilaštva u Prijedoru od 01.12.2018. godine. Od 01.07.2024. godine vršilac je dužnosti glavnog tužioca u tom tužilaštvu.

Vijeće je nakon ocjene stručnosti kandidatkinje, sposobnosti pravne analize, komunikativnosti i sposobnosti prezentacije, sposobnosti kandidatkinje da odgovorno, nezavisno i nepristrasno obavlja funkciju tužioca, uzimajući u obzir, između ostalog, dosadašnje radno iskustvo kandidatkinje, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci, rukovodne vještine i iskustvo, sposobnost upravljanja ljudskim potencijalima i ocjene kriterija podobnosti, ocijenilo da imenovana kandidatkinja u potpunosti ispunjava uslove za imenovanje propisane u članu 43. Zakona o Visokom sudskom i tužilačkom vijeću Bosne i Hercegovine.

Kada je u pitanju broj ostvarenih bodova, Vijeće je imalo u vidu da je imenovana kandidatkinja u toku konkursne procedure, u pogledu bodova za kriterij stručnosti i sposobnosti pravne analize ostvarila ukupno 100 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvarila ukupno 29 bodova od mogućih 30 bodova, što ju je u konačnici rangiralo na prvom mjestu rang liste kandidata sa ukupno ostvarenih 129 bodova od mogućih 130 bodova.

Kriteriji stručnosti i sposobnosti pravne analize imenovane kandidatkinje, koja je nosilac pravosudne funkcije, utvrđeni su na osnovu ocjene rada za posljednje tri godine za koje je ocijenjena, i to za 2019. g., 2021. g. i 2022. g., a računajući do dana isteka roka za podnošenje prijave po navedenom konkursu. Kandidatkinja nije ocijenjena za 2023. godinu, obzirom da je iz opravdanih razloga dužnost tužioca u navedenom tužilaštvu obavljala manje od šest mjeseci.

Na osnovu ocjena rada za 2019. g., 2021. g. i 2022. g., odnosno ocjena 5, 5 i 5, utvrđeno je da je kandidatkinja za navedene tri godine za koje je ocijenjena ostvarila prosjek od 5. Prema odredbama člana 56. stav 2. Poslovnika VSTV-a BiH, njenoj prosječnoj ocjeni rada za prethodne tri godine koja iznosi 5 dodijeljen je ekvivalentan broj bodova koji se koristi u konkursnoj proceduri od 100 bodova.

Ostali kriteriji, koji se odnose na sposobnost kandidatkinje da odgovorno, nezavisno i nepristrasno obavlja funkciju za koju se prijavila, profesionalne nepristrasnosti i ugleda, te ponašanja van posla, dosadašnjeg radnog iskustva kandidatkinje, edukacije i usavršavanja, objavljivanja stručnih i naučnih radova, te drugih aktivnosti u struci, komunikativnosti i rukovodnih vještina i iskustva, te sposobnosti upravljanja ljudskim potencijalima utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54c., 54d., 54e. i 54f. Poslovnika VSTV-a BiH, pri čemu je kandidatkinja po tom osnovu u konačnici ostvarila ukupno 29 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidatkinja u skladu sa čl. 59a. stav (2) tačka a) Poslovnika VSTV-a BiH stekla uvjete za predlaganje i imenovanje na poziciju glavnog tužioca okružnog javnog tužilaštva, Vijeće je vodilo računa o okolnostima koje su relevantne za procjenu podobnosti iz člana 48a. Poslovnika VSTV-a BiH, ocijenivši da ne postoje okolnosti koje izazivaju sumnju u pogledu podobnosti kandidatkinje za poziciju za koju se prijavila.

Imenovanje navedene kandidatkinje, pored uspjeha postignutog u konkursnoj proceduri, opredjelio je i sveobuhvatan program rada Okružnog javnog tužilaštva u Prijedoru za mandatni period koji je kandidatkinja dostavila u toku konkursne procedure i izložila tokom obavljenog razgovora pred nadležnom komisijom Vijeća, kao i na sjednici Vijeća. Kroz izlaganje programa rada imenovana kandidatkinja je iskazala visoke rukovodne i organizacione vještine i sposobnosti upravljanja ljudskim potencijalima.

Detaljno i uvjerljivo je obrazložila strateške ciljeve i ciljane rezultate, te je predložila mjere za unapređenje efikasnosti i kvalitete rada tužilaštva. Osim toga, detaljno je izložila moguće rizike koji bi mogli doprinijeti neostvarenju strateških ciljeva, kao i način rukovođenja navedenim tužilaštvom. U

potpunosti je kompetentna rukovoditi tužilaštvom. Kroz program rada u cjelosti je pokazala na koji način bi osigurala uspješan rad tužilaštva kroz izradu dugoročnih strateških planova. Jasno je navela na koji način bi gradila tim viših rukovodilaca i koje bi bile njihove odgovornosti.

Vijeće smatra da će imenovana kandidatkinja uspješno odgovoriti svim zadacima i izazovima koji se postavljaju pred ovako značajnu rukovodnu poziciju. Osnov za takvu tvrdnju, osim prethodno navedenog, temelji se i na stručnim i ličnim kapacitetima i integritetu, kao i iskustvu kandidatkinje kao tužioca i vršioca dužnosti glavnog tužioca Okružnog javnog tužilaštva u Prijedoru.

Uzimajući u obzir navedeno, Vijeće je ocijenilo da je imenovana kandidatkinja u potpunosti ispunila zakonom propisane uslove, kao i druge kriterije koji se cijene prilikom izbora kandidata, kako bi bila imenovana na poziciju glavnog tužioca Okružnog javnog tužilaštva u Prijedoru.

Kandidatkinja se na dužnost glavnog tužioca, u skladu sa članom 31. stav (2) Zakona o VSTV-u BiH imenuje na mandat od 5 (pet) godina.

Shodno odredbama člana 44. stav (6) Zakona o VSTV-u BiH, u slučaju pokretanja upravnog spora za ovu poziciju se odgađa stupanje na funkciju imenovanog kandidata, dok se ne okonča sudski postupak.

U skladu sa odredbama člana 2. Zakona o izmjeni Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 50/24) sva lica imenovana u periodu od 23. marta 2024. do 28. februara 2025. mogu stupiti na dužnost, a provjera njihovih izvještaja o imovini i interesima bit će izvršena nakon uspostavljanja Odjela za provođenje postupka po izvještajima. Ako ishod provjere bude negativan, bit će pokrenut disciplinski postupak u skladu sa pravilima iz člana 86d. st. (3), (4) i (5).

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Uputa o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-1034-1/2025
Datum: 27.02.2025. godine



